

Evening Dogri News Bulletin, 26 April 2024

इवनिंग डोगरी न्यूज़ बुलेटिन

समे-18:15 Hrs

Headlines

- जम्मू-रियासी संसदी हल्के च दुए मरहले तैहत होए दे मतदान च संज्ञा 5 बजे तोड़ी 67 फीसद थमां बह मतदान होएया।
- रियासी जिले च 102 ब'रे दे बुजुर्ग नै नौजवानें लेई नौकरियें ते नशे दी कबैतू थमां छुटकारे दी मंग गी लेइयै मतदान कीता।
- भारत दी सर्वोच्च अदालत नै वीवी-पैट रिकार्डर्स दे ई.वी.एम दे आँकड़ें कन्नै सौ फीसद सत्यापन दी मंग सरबंधी याचिका गी खारज करी दित्ता ऐ।
- उत्तरी कश्मीर दे बारामूला जिले च सुरक्षाबलें कन्नै टाकरे च दो बेपंछानू आतंकवादी मारे गे।

<><><><><><>

Poll Percentage Jammu LS

जम्मू संसीय हल्के च संज्ञा 5 बजे तोड़ी सब्बनें मतदान केंद्रें च 67 इशारिया 2 फीसद मतदान दर्ज कीता गेआ। जम्मू-कश्मीर दे मुख् चुनां अधिकारी मुजब गुलाबगढ़ च 71.47 फीसद, रियासी च 71.65 फीसद, रामगढ़ च 69.76 फीसद, सांबा च 69.23 फीसद, विजयपुर च 66.71 फीसद, बिश्नाह च 71.33 फीसद, सुचेतगढ़ च 63.49 फीसद आरएसपुरा जम्मू दक्खन 62.31 फीसद, बाहु इलाके च 58.07 फीसद, जम्मू पूर्व 62.78 फीसद, नगरोटा 71.39 फीसद, जम्मू पच्छिम 58.07 फीसद, जम्मू उत्तर 62.78 फीसद, मढ़ 73 फीसद, अखनूर 74.03 फीसद, छम्ब 71.06 फीसद, कालाकोट ते सुंदरबनी च 5 बजे तोड़ी 66.04 फीसद मतदान दर्ज कीता गेआ।

<><><><><><>

Polling 2nd Phase

लोकसभा चुनावें दे दुए गेढ लेई 12एं राज्यें ते इक केंद्र शासित प्रदेश जम्मू-कश्मीर च बड़ी मती गिनतरी च मतदान होएया। इनें 12एं राज्यें दी सीटें च 20 केरल, 14 कर्नाटक, 13 राजस्थान, उत्तर प्रदेश ते महाराष्ट्र, 8-8 मध्य प्रदेश, 6 असाम ते बिहार, 5-5ए 3-3 पच्छमी बंगाल ते छत्तीसगढ दियां ते इक सीट मणिपुर, त्रिपुरा ते जम्मू-कश्मीर दी शामिल ऐ। देशा दे बक्ख-बक्ख हिस्सें थमां स्हाढे संवाददाताएं दस्सेआ ऐ जे मतदाताएं गी मतदान केंद्रें च बड़ी-बड़ी रींगें च लग्गे दा दिक्खेआ गेआ ऐ। युवा ते महिला मतदाता खासे उत्साहित पाए गए। जिनें प्रमुख सियसी हस्तियें दी किस्मत ई.वी.एम च बंद होई गई ऐ, उंदे च बीजेपी दे केंद्री मंत्री राजीव चंद्रशेखर, तेजस्वी सूर्या, हेमामालिनी, अरुण गोविल, ओम बिरला ते जुगल किशोर शर्मा ना इंदे अलावा कांग्रेस दे राहुल गांधी, शशि थरूर, डी.के सुरेश ते जेपीएस दे कर्नाटक दे साबका मुखमंत्री एच.डी कुमार स्वामी शामिल ना। मणिपुर लोकसभा हल्क थमां चऊं मेदवारें सनें कुल 1 ज्हार 202 मेदवार मदान च ना। इस दौरान 16 लक्ख थमां बद्ध चुनां अधिकारिएं गी इक लक्ख 67 मतदान केंद्रें च तैनात कीता गेआ ऐ। इस दुए मरहले च 16 करोड कोलां मते मतदाताएं अपने वोट दे अधिकार दा इस्तेमाल कीता। पैहली बारी वोट पाने आले 26 लक्खव मतदाताएं दा पंजीकरण बी कीता गेदा ऐ।

<><><><><><>

PM-Voting MSG

प्रधानमंत्री नरेंद्र मोदी होरें लोकें गी लोकसभा चुनावें दे मतदान दे दुए गेढ च रिकार्ड गिनतरी च मतदान करने लेई आखेआ ऐ। इक सोशल मीडिया पोस्ट उप्पर प्रधानमंत्री होरें युवा ते महिला मतदाताएं गी मती गिनतरी च वोट पाने लेई औने आस्तै आखेआ। उनें आखेआ जे मता मतदान देशा दे लोकतंत्र गी मजबूत करूगा।

<><><><><><>

Thakur-Election

सूचना ते प्रसारण मंत्री अनुराग सिंह ठाकुर होरें लोकसभा चुनावें दे दुए गेढ च हर सीट दे मतदाताएं गी बधी-चढियै अपने वोट दे अधिकार दा इस्तेमाल करने लेई आखेआ ऐ। इक सोशल मीडिया पोस्ट उप्पर उनें हर इक नागरिक गी वोट पाइयै भारत गी इक सशक्त ते समर्थवान देश बनाने दा अनुरोध कीता।



102 Year Old Voter

जम्मू-कश्मीर च नौजवानें आस्तै रोजगार ते नशे दी कबैतु कन्नै निब्वडने दी मंग गी लेइयै रियासी जिले दे 102 बरें दे बुजुर्ग हाजीकमरदीन नै अज्ज चुनाएं दे दुए मरहले च मतदान कीता। जम्मू च 22 मेदवारें गी लेइयै 17 लक्ख 81 ज्हार मतदाताएं अपने वोट दे अधिकार दा इस्तेमाल कीता। वोट पाने आले इस बुजुर्ग दा आखना ऐ जे जेह्डी बी सरकार सत्ता च आवै जम्मू-कश्मीर दे नौजोआनें आस्तै नौकरियें दी गल्ल जरूर करै।



Nomination 5th Phase

लोकसभा चुनाएं दे 5में गेढ दी अज्ज अधिसूचना जारी होने दे कन्नै नामजदगी आले कागज पत्तर दाखल कराने दी प्रक्रिया शुरू होई गई ऐ। इस मरहले तैहत 6 राज्यें ते दऊं केंद्र शासित प्रदेशें दी 49 लोकसभा सीटें उप्पर मतदान होगा। इन्दे च 14 उत्तर प्रदेश, 13 महाराष्ट्र, 7 पश्चमी बंगाल, 5-5 ओडिशा ते बिहार, त्रै झारखंड ते इक-इक जम्मू-कश्मीर ते लद्दाख दी सीट शामिल ऐ। इस आस्तै नामांकन 3 मई तक्कर कीता जाई सकदा ऐ ते इस मरहले लेई मतदान 20 मई गी होगा। ओडिशा च दुए मरहले दे मतदान आस्तै बी अज्ज नामांकन भरने दा कम्म शुरू होई गेआ ऐ।



SC-EVM VVPAT

भारती उच्चतम अदालत नै उनें याचिकाएं गी रद्द करी दित्ता ऐ जेदे तैहत इलेक्ट्रनिक वोटिंग मशीनें दे आंकडें गी वीवी-पैट रिकार्डें कन्नै 100 प्रतिशत परतियै सत्यापित करने दी मंग कीती जा रदी ही। एहू फैसला न्यायधीश, न्यामूर्ति संजीव खन्ना ते दीपांकर दत्ता हुंदी पीठ आस्सेआ दित्ता गया। उयां एहू मामले 18 अप्रैल गी फैसले ताई आरक्षित रक्खे गेदे हे पर पीठ आस्सेआ चुनां आयोग कशा तकनीकी स्पष्टिकरणें करी इस मामले गी 24 अप्रैल लेई परतियै फेहरिस्त च रक्खेआ गेआ। चुनां आयोग आस्सेआ दित्ते गेदे परते गी ध्यानै च रक्खियै अज्ज फैसले सुनाए गे। फैसलें दे नतीजें दा हवाला दिंदे होई न्यामूर्ति खन्ना होरें आखेआ जे मतदान पत्रें कन्नै वोटिंग करने, ई.वी.एम-

वीवी-पैट दे पूरे पराते सत्यापन ते मतदाताएं गी वीवी-पैट स्लिपां देने आली याचिका पूरी चाल्ली खारिज करी दित्ती गेई ऐ। उयां सुप्रीम कोर्ट नै चुनां कमीशन गी दो दिशा दिनेश दित्ते ना। अदालतै आखेआ ऐ जे ईवीएम पर सिम्बल लोड करने मगरा सिम्बल लोड करने आली युनिटै गी सील करियै डब्बें च बंद करी दित्ता जा। मेदवार ते उंदे प्रतिनिधि सील पर दस्तखत करडन्ना। सील कीते गेदे डब्बे स्ट्रारग रूमस च ई.वी.एम-एं समेत नतीजे कडुने मगरा घट्टोघट्ट 45 दिन रक्खे जाना।

<><><><><><>

ते हुन बाकी दिएं खबरें कन्नै प्रोमिला जम्वाल।

Encounter-JK

उत्तरी कश्मीर दे बारामूला जिले च सुरक्षा बलें ते आतंकवादियें बश्कार दो दिनें थमां जारी टाकरे च 2 आतंकवादी मारे गे जिसलै के दो जुआन ज़ख्मीं होई गे। सरकारी सूत्रें मुजब सोपोर इलाके दे चक्क मोहल्ला नौपोरा च कल एह टाकरा शुरू होएया हा। रातीं लै रूकी जाने दे बाद अज्ज बडुलै परतियै गोलीबारी शुरू होई गेई। हुनै तोड़ी दो आतंकवादियें दे मारे जाने दी खबर ऐ। घाल होए दे जुआनें गी ते इक नागरिक गी जेहडा टाकरे दौरान जख्मीं होएया हा, अस्पताल इलाज आस्तै भर्ती कराया गया हा।

<><><><><><>

SC-CSC

मुख्व सचिव अटल डुल्लू होरें कल केंद्र प्रायोजित स्कीमें पी.एम विश्वकर्मा ते एम.एस.एम.ई उत्पादकता बधाने आहली RAMP स्कीम दी अमलावरी दा जायजा लैत्ता। एह स्कीमां संघ शासित जम्मू-कश्मीर दे उद्योग ते वाणिज्य विभाग आस्सेआ लागू कीत्तियां जा'रदियां ना। मुख्व चिव होरें पी.एम विश्वकर्मा स्कीम तैहत पंजीकृत कारीगरें दस्ताकारें गी असरदार समर्थ निर्माण ते सिखलाई देने आहला सरिस्ता कायम करने लेई आखेआ। उनें डिप्टी कमिशनरें गी आखेआ जे ओह सिखलाई केंद्रें दा दौरा लान तां जे कारीगरें ग म्यारी सिखलाई हासल करोआई जा जेडी स्कीम तैहत लाजमी ऐ। डुल्लू होरें पिछली मीटिंग च लैत्ते गेदे फैसलें पर कीती गेदी कार्यवाही दी रिपोर्ट दी बी नजरसानी कीती। उनें बक्ख-बक्ख जिलें च दित्ती जा रदिएं सिखलाईयें ते पंजीकरणें च ते

संतुलन बनाने की जरूरत पर जोर पाया। उन्हें आखेआ जे किश विशें पाससै लोकें दा ध्यान दनां घट्ट ऐ। एहदे गित्तै विभाग गी चाइदा जे ओह लोकें च इंदे प्रति जागरूकता पैदा करै। श्री डुल्लू होरें पंजीकृत कारीगरें दे माली इदारें कन्ने जुडाव बारै बी पुच्छ-गिच्छ कीती। उनें मंत्रालय आस्सेआ इस स्कीम दे दिशा-निर्देशें मुजब दस्तकारें गी दिती जा रदिएं टूल किट्टें की स्थिति दा जायजा बी लैता।

<><><><><><>

VDC-JK

जम्मू-कश्मीर च पुंछ जिले दे मेंढर ते आले-दुआले दे इलाकें च रमानदारी ते शांति की बहाली आस्तै सेना आस्सेआ हथियार चलाने ते गोलीबारी आस्तै ग्रामीण रक्षा गाड्स गी सिखलाई दिती जा रदी ऐ। आकाशवाणी जम्मू दे संवाददाता नै रिपोर्ट दिती ऐ जे मेंढर, हरणी ते जड़ां वाली गली इलाके च एह सिखलाई दिती गई। सिखलाई दे हिस्से दे तौर उप्पर हथियारें गी इस्तेमाल करने दे तौर-तरीकें दा प्रदर्शन कीता गेआ।

<><><><><><>

Shah-UCC

केंद्री गृह मंत्री अमित शाह होरें अज्ज आखेआ जे केंद्र च बीजेपी की अगुवाई च चला रदी सरकार आस्सेआ देशा च वी.सी.सी लागू कीता जाग जेहड़ी प्रधानमंत्री नरेंद्र मोदी हुंदी गरंटी ऐ। उनें पर्सनल लाज्ज की वकालत करने लेई कांग्रेस की नुक्ताचीनी कीती। शाह होरें मध्य प्रदेश च गुना लोकसभा हल्के च केंद्री मंत्री ज्योतिरादित्य सिंधिया हुंदे समर्थन च कीती गेदी रैली च बोलदे होई आख्ेआ जे उत्तराखंड आंगर पूरे देशा च समान नागरिक संहिता यानि यू.सी.सी लागू कीती जाग। उनें अगे आखेआ जे मोदी सरकार नै देशा थमां नक्सलवाद ते आतंकवाद गी खत्म करने दे अलावा दफा 370 गी बी खत्म कीता ऐ।

<><><><><><>

Samagra-Shiksha

डोडा दे मुख् शिक्षा अधिकारी हुंदे दफ्तरै दे कांग्रेस हॉल च कुल समग्र शिक्षा तैहत जिला सतह दा त्र'ऊं दिनें दा स्कूलें की सुरक्षा बारै सिखलाई ते जागरूकता प्रोग्राम सम्पन्न होआ। आकाशवाणी जम्मू दे संवाददाता

दी रिपोर्ट मुजब प्हाड़ी जिले डोडा दे सब्भनें 10 शिक्षा ज़ोनें दे अध्यापकें इस सिखलाई प्रोग्राम च हिस्सा लैता। इस दौरान अध्यापकें गी स्कूले च बच्चें दी सुरक्षा यकीनी करने लेई केइएं तरीके कन्नै जागरूक कीता गेआ। इस प्रोग्राम दा मुख मकसद शिक्षके गी, बच्चें गी स्कूले च इक सुरक्षित ज़ोन मुहैया करोआने बारै जागरूक करना ते उनेंगी इत्त सरबंघे च अपनी भूमिका ते जिम्मेवारी प्रति सोहगे करना हा। इस मौके पर माहिरें स्कूले च आपदा प्रबंधन योजना बनाने दी महत्ता पर जोर पाया ते स्कूले च कुसै बी माढी वारदात गी होने थमां रोकने ताई एहतियात बरतने लेई आखेआ।

<><><><><><>